



Skina di Ruthy



BON DIA YEN DI ALEGRIA !

Skirbi pa Ruthy "Lady Ruth" Vrieswijk-Bergen

Un dushi dia yen di alegria pa nos tur y un bon y felis siman nobo pa nos tur, colma di salud, bendición y mas alegria ! Nos relato di awe lo cubri un crenchi di e dushi y bunita anochi den Biblioteca Nacional recientemente cu e presentacion maraviyoso di e buki nobo di escritor y Poeta Clarette Quandus. Su coleccion nobo di poema bau di e kaft "Elegante Poeta". Un titulo cu ta describi Poetanan cu ta skirbi cu sintimento y emocion bunita y positivo sin critica otronan den forman mahos y negativo, pero semper constructivo y inspirativo.

Tawata un anochi di inspiracion sigur cu e sala yen di famia, amigonan escritor y poeta, bishitantenan y interesadonan. Bertha Wolff a fungi como e maestra di ceremonia y e team dinamico di Biblioteca Nacional presente, cu entre otro Des Croes, Astrid Britten, Ronny Alders y Tico Boekhoudt, kende a percura pa sonido.



Lady Ruth a yega un crenchi laat, pero na ora pa a tende y mira e bunita video clip estilo powerpoint bunita cu e biografia di Clarette Quandus fei chikito te awor cu tur su bunita logronan y metanan logra den su dushi bida. Un bida yen di actividad social y cultural. Clarette a hasi hopi cosnan mas banda di su skirbimento. Ela participa den diferente festivalnan di canto y a jega di actua tambe den obranan teatral. Clarette a recita hopi biaha na actividadnan social cultural na nos hermana islanan Corsouw y Bonairu y aki na Aruba mes entre otro tambe den Poetry Night, cu ta nochinan di poesia cu ta tuma lugar regularmente un bes pa luna na varios lugar aki na Aruba.

Durante e anochi ilumina aki di Clarette dia 25 di Oktober ultimo, amiga colega escritor y elegante Poeta Ariana Koolman a recita e poema titula "Briya" cu ela dedica na su colega amiga escritor y elegante Poeta Clarette y tambe e conosido elegante Poeta Omaira Britten a recita bunita poemanan y a papia un crenchi encunto e respet y aprecio cu Poetanan merece pa nan bunita inspiracionnan regularmente y cu no mester tin envidia entre Poetanan, pasobra tur tin nan mesun estilo y curazon den nan skirbimento. Tawataei presente Ministro Rudy Lampe y Ministro Glenbert Croes, y sra. Ruby Eckmeyer den representacion di Ministro Xiomara Ruiz Maduro. Den publico nos por a nota presencia di Ramon Todd Dandare y Joyce Pereira, papiamentistanan profeshonal cu curason.



Danki na e curason dinamico di Biblioteca Nacional Ronny Alders pa a saca varios potret e anochi aki, cu a wordo anima tambe pa un bunita caha di orgel, duna Lady Ruth tambe oportunidad di pose pa sali riba un di e potretnan, como recuerdo di un anochi inolvidabel pa Clarette, meymey di su bunita y dushi famia, entre nan su querida mama Edita Sofia Quandus.



No falta e dushi snacks y alcohol di bebe. Tur cu a compra e buki di poema "Elegante Poeta" por a hanja e firma y dedicacion di palabranan bunita di e autor.

Unoca ta contento atrobe di por a yuda otro Poeta publica

su obra. Y Aruba su amante di poema tin e bunita oportunidad di compra e coleccion nobo aki. Pabien amiga colega escritor y Poeta Clarette Quandus y hopi exito! Agui skirbi! Nos tin hopi pa duna den nos idioma, nos lenga materno, nos duuuuushi Papiamento!

